

Meeqqanut pinerliisimanginnermut uppersarsaatip imaa annertusillugu meeqqanik atoqateqarsinnaanngorsimasunik kinguaassiutigut pinerliisimanerit ilanngunneqartalernissaat pillugu Kalaallit Nunaanni Meeqqanut pinerliisimanginnermut uppersarsaammik malittarisassat allanngortinneqarnissaat siunertaralugu naalagaaffeqatigiinni oqartussaaffinnut saaffigineqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Allanguinerup peqataanik Namminersorlutik Oqartussat meeqqanut pinerliisimanginnermut uppersarsaammik piniarnissaminnut pisussaaffeqarnerat annertusineqassaaq inuit meeqqanut oqaatigineqartutut ukiulinnut attaveqartartussanngorlugit atorfinittussat imaluunniit sullissisussat ilanngunneqarsinnaanngorlugit.

(Inatsisartuni ilaasorta, Steen Lyng, Demokratit)

Akissuteqaat

(Ilinniartitaanermit, Kultureqarnermit, Ilageeqarnermit Nunanullu Allanut Naalakkersuisoq)

Aappassaaneerpeqarnera

Inatsisinut Ataatsimiititaliaq aalajangiiffigisassatut siunnersuummik peqqissaarussilluni suliaqarsimaneranut Naalakkersuisunit qujaffigineqarpoq.

Siunnersuut siullermeerneqartillugu Naalakkersuisut oqaatigaat, siunnersuut akuerineqartussanngorlugu Naalakkersuisunit inassutigineqartoq naammagisimaarlugulu paasillugu siunnersuut akuerineqartussanngorlugu aamma ataatsimiititaliamit inassutigineqartoq.

Ataatsimiititaliap isumaliutissiissutaani oqaatigineqarsimasut aamma Naalakkersuisunit tusaatissatut tiguneqarput. Tamanna oqaaseqaatinut aalajangiiffigisassatut siunnersuuttip ukkatarineqarneranut toqqaannartumik attuumassuteqartunut aamma siunnersuuttip suliarineqarneranut atatillugu pissutsinut allanut oqaaseqaatinut tunngassuteqarpoq.

Naalakkersuisuniillu ingerlaavartumik nalilersorneqartassaaq, meeqqanik pinerliisimanginnermut uppersarsaammik pissarsiniarnissamut pisussaaffik pillugu Inatsisartut inatsisaata naleqqussarneqarnissaanut tunngavissaqarnerisooq, aamma tassunga atatillugu ataatsimiititaliap oqaaseqaatai eqqarsaatersuutinut ilanngunneqarumaarput.